

**SOALAN-SOALAN LISAN
MESYUARAT KETIGA TAHUN KETIGA
DEWAN NEGERI YANG KELIMA BELAS PERAK DARUL RIDZUAN**

**PERSIDANGAN PERTAMA
25 DISEMBER 2025 (SELASA)**

1. YB ENCIK MUHAMMAD FAISAL BIN ABDUL RAHMAN (TRONG)

Berapakah jumlah Sekolah Kafa Intergrasi di tutup dari tahun 2020 hingga 2025 di Negeri Perak, apakah faktor penutupan ini dan kenapakah berlaku kekurangan guru di Sekolah Kafa pada tahun 2025 ?

2. YB DR MOHAMAD YUSRI BIN BAKIR (AYER KUNING)

Isu kewujudan ikan asing seperti peacock bass, baung merah dan ikan bandaraya di sungai, tasik dan lombong negeri Perak terutamanya di beberapa lombong dalam kawasan Ayer Kuning.

1. Apakah langkah pemantauan dan penguatkuasaan yang sedang dilaksanakan oleh kerajaan negeri bagi mengawal pelepasan ikan asing seperti peacock bass, baung ekor merah dan ikan bandaraya di perairan awam negeri Perak yang boleh mengancam ekosistem tempatan?
2. Adakah Kerajaan Negeri telah menjalankan kajian saintifik atau bekerjasama dengan institusi penyelidikan atau Jabatan Perikanan bagi menilai kesan kehadiran spesies ikan asing terhadap populasi ikan tempatan dan sumber pendapatan nelayan darat di Perak?
3. Apakah rancangan jangka panjang kerajaan negeri untuk meningkatkan kesedaran awam dan komuniti pemancing supaya tidak melepaskan spesies ikan asing ke dalam sungai atau tasik, termasuk melalui program pendidikan alam sekitar atau kempen teknologi hijau?

3. YB ENCIK ROSLI BIN ABD RAHMAN (PASIR PANJANG)

Akibat peningkatan jumlah penduduk yang agak mendadak di kawasan Lekir sejak kebelakangan ini: Mohon Kerajaan Negeri nyatakan langkah-langkah yang telah dan akan diambil bagi memastikan bekalan air bersih yang dibekalkan kepada penduduk mencukupi dan memenuhi keperluan mereka.

4. YB ENCIK AZMAN BIN NOH (PENGKALAN BAHARU)

Apakah persedian Negeri Perak bagi menyambut tahun melawat Malaysia 2026 kerana menurut statistik kemasukan pelancong ke Negeri Perak walaupun ada peningkatan tetapi masih belum mampu menjadikan pelancong bermalam di negeri Perak?

5. YB DR NAJIHATUSSALEHAH BINTI AHMAD (BOTA)

Mohon nyatakan pendirian dan pelan tindakan kerajaan negeri terhadap penjualan produk vape dan rokok elektronik yang semakin berleluasa di negeri ini?

Bagaimana kerajaan negeri hendak mengekang jualan produk ini secara atas talian?

Adakah kerajaan mempertimbangkan penggubalan enakmen khusus diperingkat negeri bagi perkukuh kawalan penjualan bahan mengandungi nikotin seperti vape dan rokok elektronik?

6. YB PUAN BAVANI A/P VERAIAH (MALIM NAWAR)

Pengurusan Sisa dan Tapak Pelupusan Baharu

a) Apakah status semasa pelan pembangunan tapak pelupusan baharu di Kampar menggantikan tapak sedia ada yang hampir penuh?

b) Adakah Kerajaan Negeri mempertimbangkan penggunaan teknologi rawatan sisa moden seperti “*waste-to-energy*”?

c) Apakah langkah bagi memastikan pengurusan sisa padat tidak menjejaskan kesihatan awam dan alam sekitar?

7. YB PUAN NORHASLINDA BINTI ZAKARIA (PANGKOR)

Mutakhir ini, pelbagai kes buli dan keganasan di sekolah serta institusi pendidikan tular di media sosial, menimbulkan kebimbangan ibu bapa dan masyarakat terhadap keselamatan anak-anak kita di sekolah. Perkara ini bukan sahaja menjejaskan emosi dan motivasi pelajar, malah boleh mencalarkan imej institusi pendidikan negeri. Apakah langkah-langkah pencegahan dan tindakan tegas yang telah dan akan diambil oleh kerajaan negeri, khususnya dalam memperkukuhkan program anti-buli dan keselamatan pelajar, termasuk usaha pendidikan kesedaran di sekolah-sekolah seluruh Negeri Perak?

8. YB ENCIK CHEAH POU HIAN (JELAPANG)

Satu video yang tular di media sosial menunjukkan lebih 200 buah motosikal terlibat dalam lumba haram di Jalan Besar Jelapang. Masalah Mat Rempit ini semakin menjadi-jadi, bukan sahaja mengganggu ketenteraman awam, malah membahayakan nyawa orang awam dan mengakibatkan kerosakan harta benda. Justeru, persoalan saya ialah:

a) Apakah langkah penguatkuasaan dan pencegahan yang telah serta akan diambil oleh pihak polis dan pihak berkuasa tempatan setakat ini? Sejauh manakah keberkesanan usaha- usaha tersebut?

- b) Adakah terdapat perancangan untuk memasang sistem kamera laju dan pemantauan di jalan raya tertentu bagi mengukuhkan tindakan penguatkuasaan serta memulihkan ketenteraman komuniti?

9. YB ENCIK CHAW KAM FOON (MENGLEMBU)

PENCEMARAN SUNGAI

- a) Sila nyatakan jumlah kes pencemaran sungai yang telah direkodkan sepanjang tahun 2025 dan apakah tindakan penguatkuasaan yang diambil terhadap pihak yang bertanggungjawab?
- b) Nyatakan langkah terkini yang telah diambil oleh Kerajaan Negeri dalam usaha mengurangkan pencemaran air sungai?

10. YB DATO' ZAINOL FADZI BIN PAHARUDIN (SUNGAI MANIK)

Apakah usaha dan perancangan Kerajaan Negeri dalam memperkukuhkan industri kopi tempatan, khususnya dalam menggalakkan petani dan pekebun berminat menanam kopi sebagai sebahagian daripada strategi menjadikan Negeri Perak sebagai destinasi utama Agrotourism di Malaysia?

11. YB ENCIK CHOONG SHIN HENG (CHENDERANG)

Bencana tanah runtuh dan banjir kilat

Beberapa kawasan di sekitar DUN Chenderiang telah mengalami tanah runtuh kecil dan banjir kilat, terutamanya selepas hujan lebat yang menjejaskan keselamatan penduduk dan pengguna jalan raya. Sehubungan itu, saya ingin bertanya kepada pihak Kerajaan Negeri:

- a) Apakah langkah-langkah yang telah dan akan diambil oleh kerajaan negeri bagi menangani kejadian tanah runtuh di Taman Bunga Raya Tapah dan Taman Highland dan banjir kilat di kawasan sekitar Kampung Baru Chenderiang, Taman Seri Chenderiang, Kampung Pahang, Taman Highland , Kampung Samy dan Taman sekitar Jalan Pahang sampai ke batu 6 termasuk usaha jangka panjang untuk mengurangkan risiko bencana di kawasan berisiko tinggi tersebut?
- b) Bilakah projek-projek tebatan banjir akan dilaksanakan oleh JPS di Kg Baru Chenderiang seperti pembinaan asas ban sungai yang akan memudahkan kerja penyelenggaraan di masa hadapan dan dapat memastikan tahap keberkesanan penyelenggaraan lebih optimum?
- c) Apakah status laporan Siasatan Tanah (Soil Investigation- SI) terkini yang telah dilaksanakan oleh Kerajaan untuk Insiden tanah runtuh di Taman Bunga Raya Tapah?

12. YB PUAN WONG CHAI YI (SIMPANG PULAI)

Larangan Penjualan Vape di Perak

- a) Apakah kajian impak kesihatan dan ekonomi yang dijalankan oleh kerajaan negeri sebelum memutuskan untuk melaksanakan larangan penjualan vape di bawah bidang kuasa pihak berkuasa tempatan (PBT)?
- b) Adakah Kerajaan Negeri telah menjalankan penilaian risiko terhadap kemungkinan kemunculan pasaran gelap, khususnya melalui platform dalam talian dan kawasan sempadan negeri selepas larangan dilaksanakan?
- c) Bagaimanakah Kerajaan Negeri akan memantau dan menguatkuasakan larangan ini, termasuk langkah mencegah penjualan vape secara dalam talian atau di kawasan sempadan yang mungkin sukar dikuatkuasakan oleh pihak berkuasa tempatan?

13. YB ENCIK MOHD HAFEZ BIN SABRI (MANJOI)

HAIWAN BERKELIARAN

- a) Apakah usaha segera kerajaan bagi mencegah isu lembu dan kerbau yang masih berkeliaran dalam DUN Manjoi seperti di perumahan Taman Jati, Gerbang Meru Indah, Laluan Masjid Al-Ansar Taman Meru Permai dan Bandar Meru Raya?
- b) Apakah usaha kerajaan mengatasi masalah najis binatang tersebut yang bertaburan di jalan terutama di Jalan Utama Bandar Meru Raya dan juga laluan masjid?
- c) Adakah kerajaan mempunyai langkah-langkah bagi mengatasi gangguan babi hutan yang masih mengganggu kawasan penduduk di Kampung Sungai Kati disebabkan tanah rizab yang tidak diselenggara ?

14. YB ENCIK ZAFARULAZHAN BIN ZAN (KAMPONG GAJAH)

Apakah tindakan dan langkah yang telah diambil oleh Kerajaan Negeri Perak bagi mengharamkan penjualan serta penggunaan minuman keras (arak) di negeri ini?

15. YB CIK JENNY CHOY TSI JEN (CANNING)

Projek yang telah dilaksanakan di kawasan DN Canning bagi Tahun 2025. Apakah projek-projek pembangunan yang telah dilaksanakan oleh Majlis Bandaraya Ipoh (MBI) di bawah kawasan DN Canning bagi tahun 2025, beserta jumlah peruntukan atau kos yang telah dibelanjakan bagi setiap projek?

16. YB ENCIK MUHAMMAD HAKIMI HAMZI BIN MOHD HAYAT (TITI SERONG)

Apakah solusi bagi mengatasi masalah urusan jual beli arak melibatkan pekerja muslim di kedai serbaneka?

17. YB ENCIK GOH SEE HUA (PASIR PINJI)

Pelan Tindakan Bandar Pintar Negeri Perak 2040

- a) Apakah fokus utama Kerajaan Negeri pada masa kini dalam pelaksanaan pelan tindakan ini dan sejauh mana kemajuan yang telah dicapai setakat ini?
- b) Apakah peranan khusus PBT serta serta inisiatif yang sedang dan bakal dilaksanakan bagi merealisasikan konsep bandar pintar di seluruh Negeri Perak?
- c) Bagaimanakah sektor swasta, NGO dan masyarakat setempat dilibatkan dalam proses pelaksanaan?

18. YB PUAN KOO HAAI YEN (KERANJI)

Pembangunan Sektor Pelancongan Komuniti di Kampar

- a) Apakah inisiatif Kerajaan Negeri untuk membangunkan pelancongan komuniti di Daerah Kampar seperti Gua Tempurung, Air Terjun Batu Berangkai dan Kampung Tradisional?
- b) Adakah Kerajaan Negeri menyediakan bantuan promosi atau geran khas kepada pengusaha pelancongan tempatan di kawasan ini?
- c) Apakah sasaran peningkatan jumlah pelancong domestik dan antarabangsa ke Kampar bagi tahun 2026?

19. YB PUAN THULSI THIVANI A/P MANOGARAN (BUNTONG)

Kerajaan Negeri telah mengambil langkah proaktif untuk melarang penjualan rokok elektronik atau “Vape” di negeri Perak bermula Januari 2026. Langkah ini sememangnya satu langkah yang perlu dan tepat pada masa. Soalan:

- a) Bagaimana pihak Kerajaan Negeri akan memastikan penguatkuasaan larangan ini adalah seragam di semua 15 pihak berkuasa tempatan?
- b) Apakah hukuman atau tindakan undang-undang yang ditetapkan bagi perniagaan yang didapati melanggar larangan ini?